

# SLOBODA OKUPLJANJA



## PRAVNI OKVIR

Pravo na slobodu okupljanja u BiH regulisano je nizom zakona i podzakonskih akata: Ustavom BiH, ustavima entiteta i kantona, Statutom Brčko distrikta, zakonima o slobodi okupljanja entiteta i kantona, ali i zaštićeno međunarodnim dokumentima koje je BiH ratificirala ili usvojila u svoj pravni sistem, kao što je Evropska konvencija o zaštiti ljudskih prava i osnovnih sloboda.


Nažalost, trenutni zakonski okvir je neharmoniziran i nudi različite definicije i tumačenja osnovnih pojmova kao što su: pojam javnog okupljanja, vrste javnog okupljanja, prostor predviđen za javno okupljanje, sadržaj prijave i izdavanje dozvola za javno okupljanje, obveze organizatora i obveze nadležnih organa, donošenje rješenja za javno okupljanje.



## PRVA BOSANSKOHERCEGOVAČKA POVORKA PONOSA

U 2019. godini pokazalo se da Zakon o javnom okupljanju KS na isti način tretira profitne/profesionalne manifestacije i neprofitna i mirna okupljanja građana\_ki što de facto građane\_ke sprječava da u potpunosti neometano koriste svoje pravo na slobodu okupljanja.

Pri organiziranju prve Bosanskohercegovačke povorke ponosa, organizatori\_ce su morali unajmiti i snositi troškove zaštitarske agencije, prisustvo hitne pomoć i pripravnost vatrogasne službe. Morali su da obezbijede i prisustvo vlastitih redara\_ki za održavanje reda i mira na skupu, te željezne ograde na mjestu polaska i završetka povorke, kao i betonske barijere na određenim lokacijma a čiji je broj kao i same lokacije odredio MUP KS.



## DOKUMENTOVANI SLUČAJEVI

Početak decembra 2019. godine, SOC je kao organizator Međunarodnog queer film festivala Merlinka kontaktirao The Brew Co. – BIS (Brew Imperial Society) s upitom da se Festival održi u njihovim prostorijama. Zgrada u kojoj se nalazi BIS je u vlasništvu Općine Centar Sarajevo, a BIS ga iznajmljuje od HKD Napredak. U svom negativnom odgovoru na upit, BIS je naveo da “radi poslovno tehničke suradnje sa HKD Napredkom nismo u mogućnosti organizovati sve vrste evenata”.

SOC je, da bi provjerio navode iz gore spomenutog odgovora i utvrdio da li se radi o odbijanju usluge zbog rada SOC-a na pravima i kulturi LGBTI osoba, od Općine Centar tražio ugovore, te dobio 2 ugovora između Općine i HKD Napredak. Međutim ugovor o poslovno-tehničkoj saradnji između vlasnika BIS-a i HKD Napredak nije dostavljen pod opravdanjem zaštite ličnih podataka.

SOC će u narednom periodu kroz direktnu komunikaciju s HKD Napredak utvrditi na koji način je tačno ugovorom između BIS-a i Napretka definisano koje vrste događaja se mogu održavati u spomenutom prostoru.

Dakle i u 2019. godini se nastavlja trend ograničavanja pristupa LGBTI osoba javnom prostoru, ugostiteljskim/kulturnim objektima i uslugama dostupnim drugim građanima\_kama. Pri tome, netransparentnost i nefikasnost općinske administracije doprinosi i olakšava diskriminaciju i odbijanje pružanja usluga LGBTI građanima\_kama.



## ZAKLJUČAK

Zbog nivoa homofobije/transfobije u društvu, koja je posebno usmjerena na pitanja slobode okupljanja i vidljivost LGBTI osoba u javnom prostoru, te uočeni trend trostrukog povećanja broja slučajeva govora mržnje i poticanja na mržnju u periodu od najave Povorke, okupljanja LGBTI osoba moraju biti osigurana kako LGBTI osobe ne bi bile izložene napadima i nasilju, što i jeste obaveza policijskih agencija i relevantnih institucija, i ne smiju biti uslovljena finansijskim mogućnostima organizatora\_ica.